



Završena sedmodnevna obuka u organizaciji Ambasade SAD-a



Akcija u bivšoj kasarni,
u Istočnom Sarajevu

Foto: D. TORCHE

SPREMNI ZA VANREDNE SITUACIJE

• Američki marinci, pripadnici Specijalne jedinice SIPA, policije KS-a i Direkcije za koordinaciju policijskih tijela BiH razmijenili iskustva • Imalo se šta naučiti, kaže Bošnjak

Američki marinci Fast tima, pripadnici Specijalne jedinice SIPA, policije Kantona Sarajevo i Direkcije za koordinaciju policijskih tijela BiH, jučer su u prostoru bivše kasarne "Slaviša Vajner Čiča" u Istočnom Sarajevu izveli pokaznu vježbu kao rezultat sedmodnevnog programa obuke, koja je omogućila učesnicima da usavrše interoperabilnost i saradnju između SAD-a i sigurnosnih agencija naše zemlje.

Dobar prijem

Tokom sedam dana obuke, u kojoj je učestvovalo oko stotinu službenika svih agencija, završene su vježbe na nekoliko strelišta u Sarajevu, gdje su unaprijeđene međusobne vještine u gađanju. Kako je kazao oficir za sigurnost u Ambasadi SAD-a Kevin Murphy, prije nekoliko mjeseci Ambasada je sa marincima američke vojske ostvarila partnerstvo i odlučila se za ovaj program obuke, čiji je cilj da bh. specijalci i policajci budu spremni za sve vanredne situacije.

- Iako imamo jako dobru saradnju sa svim agencijama za provođenje zakona u BiH, izabrali smo baš ove tri, budući da podjednako dijele odgovornost da po potrebi odgovore na pozive u vezi sa sigurnosti američke ambasade, kazao je Murphy.

Kapetan američkih marinaca Adam Drexler kazao je kako su marinci imali jako dobar prijem u BiH.

- Ovo je bila izvanredna prilika za nas marince, osoblje američke ambasade kao i za pripadnike bh. institucija i agencija da podijelimo naša iskustva kako bismo unaprijedili taktike, ali i saradnju, kao i da steknemo nova iskustva, kazao je Drexler.

Pomoćnik direktora Sektora za osiguranje VIP osoba i objekata Direkcije za koordinaciju policijskih tijela BiH Ivica Bošnjak naglasio je kako se prethodnih dana imalo šta vidjeti i naučiti. Dodao je kako je obuka bila veliko iskustvo za sve policijske djelatni-

ke svih agencija, koje su ovih dana participirale u izvođenju obuke i taktičkih vježbi. I komandir Operativne jedinice Alfa MUP-a KS-a Edin Rovčanin ocijenio je saradnju kao novo dragocjeno iskustvo.

Uživanje u hrani

Jučer je istaknuto kako obuka nema nikakve veze sa posljednjim nemilim događajima u BiH, niti predstavlja odgovor za sigurnosnu zabrinutost u BiH, već je njen osnovni cilj bio unaprijediti sigurnosne sposobnosti učesnika. U Sarajevo su došla dva voda marinaca, koji su spremni da djeluju brzo, bilo kada i bilo gdje u svijetu. Tokom boravka u glavnom gradu, zabavljali su se u restoranu Pivnice HS, a za njih je organiziran i roštilj sa ćevapima.

- Marinci uživaju u hrani, kako u restoranima, tako i u našoj ambasadi, poručili su iz Ambasade SAD-a u BiH. **A. GRABOVAC**